

四庫全書薈要

• 乾隆御覽本

集部

欽定四庫全書薈要

集部

盈川集卷九

十九

詳校官助教臣常循



盈川集卷九

唐 楊炯 撰

墓誌

鄮國公墓誌

永昌元年春二月甲申朔鄮國公薨公諱柔字懷順弘農人也縣犯太原王廟諱改為仙掌焉公即隋煬帝之玄孫元德太子之曾孫恭帝之孫鄮國公行基之子粵

若稽古崇德象賢統承先王脩其禮物惟丞相保寧西  
漢惟太尉亮弼東朝功書王家澤流后嗣亦猶司徒之  
敬敷五教殷德日新后稷之播時百穀周有大賚隋高  
祖昧旦丕顯齊聖廣淵皇天眷佑誕受顧命恭皇帝遜  
位明敷能讓天下作賓皇室與國咸休系承百代之宗  
國稱二王之後公山河積氣清白餘基孝友著於閭門  
信義行於邦國縱心妙用不出戶庭覃思典墳不窺園  
圃及其上公傳位命服居前有怵惕之心無驕矜之色

漢之平帝猶敬劉歆宋之戴公尚聞商頌大唐貴為辰  
極富有靈瀛用三王之禮以同天地奏八代之樂以答  
神祇郊上玄定泰時金繩玉匣日觀登封左个西偏明  
堂布政未嘗不虞賓在列周客來庭禮秩尊於百僚贊  
拜絕於羣后猶能小心畏懼恪慎肅恭上帝時歆下人  
祇協以為藩屏以訓子孫稟命不融享年五十有五鳴  
呼哀哉越某月葬於某原嗣子某官生盡其孝死盡其  
哀學不替於為喪禮有踰於鑽燧卜其宅兆俾無後艱

述其家風謂之不朽其銘曰

有客有客乘殷之馬建于上公尹茲東夏有客有客乘  
殷之輅作賓王家率由典故天之蒼蒼人之云亡栢櫨  
成行魂歸故鄉

常州刺史伯父東平楊公墓誌銘

楊氏之先其來尚矣在皇為皇軒在帝為帝嘗在王為  
周武在霸為晉文此之謂不朽西京為丞相東漢為司  
徒魏室為九卿晉朝為八座此之謂代祿公諱德裔字

德裔弘農華陰人也即常州刺史華山公之元孫左衛  
將軍武安公之長子生而岐嶷代不乏賢事親以孝聞  
在鄉黨恂恂如也始以父任為太子左千牛備身轉秀  
容華亭福昌雒四縣令詔封東平公策勲上柱國是時  
也天子仄席求賢勵精為化以公屈臨小縣焉用牛刀  
處治中別駕之任方展其驥足耳擢拜潁州幽州二司  
馬寬以制猛嚴而不殘每行縣錄囚徒其所平反者十  
八九詔徵尚書郎御史中丞審審亮直有王臣之節尋

以公事去官復拜饒州括州越州都督府三州長史在  
會稽引陂水溉田數千頃人獲其利于今稱之焉遷棣  
曹恒常四州刺史歷政清白為當時所重於是覽先賢  
之言知止足之分罷歸初服告老私庭乃率羣從子弟  
營別業於宜神鄉之望仙里其制宅也宗廟為先廡庑  
為次居室為後喟然而言曰古人所謂歌於斯哭於斯  
聚國族於斯者吾知之矣維文明元年夏四月某日薨  
於正寢春秋八十有五嗚呼哀哉公簡貴不交流俗非



禮不動非禮不行望之儼然聽其言也屬博觀史籍不  
學書生尋章摘句而已至於臺閣舊事法令科條莫不  
成誦在心若指諸掌最為六尚書郎二年御史中丞滿  
歲宰人者四縣上佐及專城者九州盛德形容被於歌  
詠門生故吏遍於天下永淳二年與駕幸東都召見公  
於金城頓訪以得失公採摭羣言悉心以對高宗嗟嘆  
者良久賜几杖粟帛鄉里榮之一子令珍早亡朝夕溫  
清者四女公慨然有喪明之痛因不豫彌留遺命以弟

之子神毅為後越垂拱元年春二月某日與夫人隴西李氏合葬於某原禮也遠近會葬千餘人操筆而為誄者以百數嗚呼哀哉其銘曰

巖巖華山峻極于天上侵神氣下固窮泉夫惟積德生我大賢其一滔滔河水中國之紀派別九都經營萬里夫惟積潤生我君子其二惟忻之城惟華之亭宜陽之地益部之星公為其宰不殞其名其三汝陰之國薊門之北陂水朝黃燕雲夜黑公為其佐日宣其德其四入踐郎官舍

香握蘭來居白室直繩明筆潘子一除士師三黜

其邑五

號鄱陽山名括蒼東南之美吳會之鄉展其驥足有賴

王祥

其六

四州之大是稱都會千里之榮即分麾蓋言旋

舊國保茲耆艾

其七

生為貴臣死為貴神陰堂是夜古木

非春鄧攸無子天道何親

其八

### 杜袁州墓誌銘

公諱某字某京兆杜陵人也高辛之撫教萬方堯帝之  
平章百姓傳稱聖人之後易曰積善之家在夏為御龍

在周為唐杜三王以降百代可知車服出於南陽衣冠  
襲於京兆曾祖榮華後魏秦州別駕祖良宇文朝復州  
長史父舉唐易州司兵叅軍州事端履道掾史安貞厚  
於天爵薄於人位闕里之庭學夫詩禮太丘之門執其  
羔鴈公孝慈而敬威莊而安淹貫義方周覽典籍服其  
服則文之以君子之容遂其辭則實之以君子之德起  
家左翊衛選授貝州府倉叅軍事出自中禁在於外臺  
謹其蓋藏實其倉庾尋遷蓬州咸安許州長杜湘州洛

陽三縣令地方百里官歷三城言非法度不出於口行  
非公道不萌於心令不肅而威宣教不舒而德洽轉號  
州司馬制授朝散大夫婺州司馬又遷蘇州長史加中  
散大夫鸞鳳不棲於枳棘燕雀不集於梧桐宜得其材  
非公莫可我大周誕受萬國寵綏四方建官惟賢垂拱  
而理乃命公為朝議大夫使持節袁州諸軍事守袁州  
刺史天王之使列國之君發其德音而勸不用賞正其  
顏色而禁不用刑德成而位尊名遂而身退乞骸告老

謝病言歸以某年月日終於淮海之館春秋七十有七  
嗚呼哀哉夫人太原王氏魏驃騎大將軍新昌公平之  
曾孫唐蜀王府典軍上柱國志隆之女也纂承洪烈嗣  
續徽音中外柔嘉小大懷睦夫人之化國風美於鵲巢  
寶劍之沉夜氣衝於牛斗享年四十八嗚呼咸亨二年  
某月日終長杜之官第維天授三年春二月合祔於杜  
陵之平原禮也王人弔祭儀仗官給長子某官等毀形  
於骨痛貫於心父母哀哀昊天莫報佳城鬱鬱白日何

年願述餘風式銘幽壤其銘曰

鳳凰鳴矣于彼高崗顯允君子邦家之光猗歟令德秀  
於閨房歲云暮矣池樹荒涼死則同穴如何彼蒼

隰川縣令李公墓誌銘

公諱嘉字大善隴西成紀人也趙郡太守雍州大中正  
上開封府永康公之孫幽州都督鎮軍大將軍上柱國  
丹陽公之子重華以文明允塞謨九德於臯陶仲尼以  
恭儉溫良緒六經於柱史將軍李牧人主願其同時河

尹李膺天下思其執御況乎衣冠代美祖考家聲占於  
日月為宗周之姬姓誓以山河則炎漢之劉氏公門承  
將相地積英靈望之儼然橫斷山而鬱起聽其言也注  
懸河而不竭玉則秦王所見天照白虹劍則殷帝所傳  
星浮紫氣假使蔡中郎之博學郭有道之人倫何嘗不  
聞迎王粲而倒屣為茅容而下拜起家為太子左千衛  
以調升也按河圖於玉版震一索而為長男考天象於  
銅渾心前星而為太子直城霞遠曲障雲平出入青牕



之門周旋黑衣之列稍遷越王府戶曹參軍越之建國  
也地居南斗之躔王之受封也禮極東門之拜郎爵所  
以隆懿親恭和所以資明德一言而干楚后即從雲夢  
之畋三見而說趙王仍襲上卿之印又遷隰川令川原  
爽塏風俗和平晉獻公之盾夷吾是邑代恭王之子郢  
容為侯陽泉依六壁之城孟津合三溪之水公以輜車  
就列墨綬當官有蠶績於邨人用牛刀於魯邑市鄧無  
競不假鞭絲學校方興唯聞擊石諸侯取其軌則四海

瞻其儀表為杜陵之男子誰繼後曹茂鄉里之小人願  
辭彭澤於是退歸初服就養私門戲嬰兒於階下扶老  
子於井上尋丁外艱哀毀踰制加人一等俯就三年服  
闋襲封丹陽公勲上騎都尉公以安車禮盛賜杖年高  
被服先王之道優游太平之化左琴右書謀孫翼子居  
常飽德不言何氏之萬錢直置當仁豈特于公之駟馬  
清風可賞必有鸞鳳相期白雪時遊多以神仙見屬義  
形於金石節貫於松筠西山五日之朝將化羽而生翼

北海明年之驗便展辰而至已以永淳元年八月二十  
一日終於京師道政里之私第享年七十二嗚呼哀哉  
長子隨州光化縣令守節等哀纏弔鶴痛結鄰人孝之  
始也則身體髮膚所以全其性孝之終也則衣裳棺槨  
所以成其禮天高八萬想京兆而何從地濶三阡對佳  
城而有恨越弘道二年歲次甲申正月甲申朔二十六  
日已酉陪葬於昭陵東南之平原烟樗櫟庸材瓶簋小  
器仰惟先友叨雅契於金環俯逮婚一作嘉姻荷深知於

玉潤南容有道僅聞將聖之言東武建瑩俄述安仁之賦嗚呼哀哉乃作銘曰

爰初帝子堯之大理降及真人國之柱史衣冠百代慶靈千祀吉兆占熊嘉名贈鯉聿脩厥德必復其始大孝因心至仁由已肅成門內章華宮裏父任為郎學優則一作仕陽山之曲蜀江之涘月旦垂鳬田間狎雉其心從若鏡其直如矢亟改炎涼罷歸桑梓象賢舊國安車暮齒忽愴池臺俄悲生死郭門一望郊烟四起夫復何言

平生已矣

李懷州墓誌銘

公諱冲寂字廣德隴西狄道人也左衛大將軍西平王之孫荊州大都督漢陽王之子今上之族兄也原夫帝堯之緒運期受於天漢顓頊之胄大命集於皇家光耀則若木十枝波瀾則長河九派或中軍按部金鼓所以接其聲或刺史班條冕旒所以彰其德信可謂玉林多寶天族多奇以御邦家以藩王室者也公山河誕慶辰

昂發祥金多木少孔文舉之天骨玉潔冰清華子全之  
神彩南陽季恭偉懸識宰臣沛國趙元儒竊知公望編  
漢皇之兄弟列周室之邢茅天下稱其八才吾家號為  
千里初任尚舍直長稍遷城門郎仍奉勅於弘文館讀  
書掌舍諸宮城門列校制詣東觀有黃香之博聞賜其  
制書有班游之廣學尋授駕部員外郎轉金部郎中又  
勅公為戎州道支度軍糧使天府充勅軍儲委積振南  
宮之紱冕譽表三臺歷西蜀之江山榮高駟馬遷太府

鴻臚二少卿丁艱去職楊播之登太府初聞累遷之命  
鄭默之拜鴻臚遽見終喪之禮孔宣尼既祥五日彈不  
成聲孟獻子加人一等懸而不樂服闋厯青德齊徐四  
州刺史東臨巨海西至長原或全齊厯下之軍或大禹  
徐方之地任隆刑部陶侃八州寄重潯陽桓伊十郡遷  
宣州刺史吳王舊邑楚國先封江迴鵲尾之城山枕梅  
根之冶蜀郡無此計吏則惟薦張堪潁川尤多制書則  
但稱黃霸巡察使以尤異聞遷陝州刺史觀其并邑號

伯上陽之故墟度其川原周公分陝之遺跡唇齒通其  
列國咽喉壯其天險善人為政無待於百年童子行謠  
先符於兩日于斯時也天以順動帝以會昌修封禪於  
岱嶽作明堂於汶上望山川而徧羣神執玉帛而朝萬  
國制公檢校司理常伯文昌之省遙接大階建禮之門  
旁連複道萬機匡贊八座謀猷既陪軒帝之巡仍覲漢  
家之事屬河孫南走憑斗骨而為城居衛滿東亡界  
朝鮮而為役屬乘輿乃誅後至討不庭申命六事之人



以問三韓之罪制曰師出遼左卿可為北道主人檢校  
營州都督石門山險銅鼎河流天文則營室辨方地象  
則神臺鎮野供其行李鄭國有東道之名為我主人常  
山當北州之寄遼東平以功遷蒲州刺史堯都蒲坂舜  
耕厯山昭襄王始作河橋穆天子至於雷首汝南朕之  
心腹遂拜韓崇河東吾之股肱時徵季布遷少府監忠  
信為主楊阜齊衡清白在官常林比德又除蒲州刺史  
諸童之逢迎郭伋再牧并州百姓之願得耿純復臨東

郡孝敬皇帝國之儲嗣乾之長男四極奏於重光二年  
賓於上帝崇其謚號用黃屋於羽儀卜其園塋象玄宮  
之制度山陵之建也以公檢校將作大匠游衣漢寢之  
外抱劍橋山之下百工畢力陳琳於是乎躬親諸吏懷  
恩魏霸於是乎無謫遷銀青光祿大夫行少府監若夫  
協時月乘天正秦人往事遊別館而祈年漢宮舊儀下  
明庭而避暑上幸九成宮以公檢校右領軍將軍本官  
如故董司戎政以戒不虞七校陳其甲兵五營按其軍

服領軍之職用文武於紀瞻右軍之官敘勤勞於常惠  
尋以公事免左授歸州司馬楚之舊也始得子男之田  
夔之先也裁為附庸之國人同賈傳路似長沙伯騫有  
聲於鄉里仲任見知於筆札制遷中大夫行兗州都督  
府長史大庭之庫少昊之墟上真降婁金精吐宿旁瞻  
日觀木德題山別乘初迎將宣萬邦之化佩刀終爽徒  
見三公之服以永淳元年某月日行次唐州方城縣遇  
疾薨朝廷聞而傷之贈懷州刺史公嚴而有禮直而能

和行孝立身移忠事主生知者上重之以八索九丘道  
在斯尊加之以文昭武穆故能入登常伯出踐方州為  
六卿之儀表發三軍之號令列長戟於門前羅曲旃於  
堂下子孫朝夕玉樹相輝賓客遠迎玳簪交映悲夫展  
禽三黜安仁再免奚辭棘署俯集桐華慘舒則不繫于陰  
陽喜愠則不形于顏色何嗟及矣竟遊東岱之山無所  
不知旋閉南陽之墓二年夏五月日葬於萬年縣龜川  
鄉之平原長子某官某次子某官某箕裘必復花萼生

光隣人泣其悲慟明主憂其毀瘠觀其弔客不無雙鶴  
之徵察其成墳自有百鳥之感森森隴樹漠漠郊烟右  
玄灞而浩蕩左驪山而起伏杜陵萬家之邑非復城池  
滕公駟馬之銘不知年代其銘曰

高陽積德武昭餘慶宅鎬開基封唐起聖協和萬國平  
章百姓天叙諸侯禮樂宗正其周之曲阜漢之平陸地  
則葭莩祥惟嶽瀆鄉黨稱善閨庭雍穆始拜城門即遊  
天祿其太微之位益部之星卿則有六四至丹青州則

有九八牧專城既踐臺閣仍司甲兵其三倚伏無兆遭隨

有運賈誼從王桓譚佐郡自忘寵辱曾無喜愠人去何

歸天高不問其四東都門外長樂宮邊白馬旒旒青鳥墓

田楸梓夾路碑石書年百代之後南陽之阡其五

從弟去盈墓誌銘

古者黃帝軒轅氏沒帝嚳高辛氏作幼而徇齊長而敦  
敏則天下之人用其教者百年忠肅恭懿宣慈惠和則  
天下之人謂之才者八子黃鳥旗而白魚躍有周武之

興王彤弓一而旅矢千有晉文之起霸雖隱公遜位哀  
侯失國而文之昭也武之穆也司徒為五教之官有社  
稷焉有黎人焉丞相臨萬機之職峻函鼎盛赫夾於朱  
輪河洛台階昭彰於白玉積善餘慶信而有徵國子進  
士楊去盈字流謙弘農華陰人也曾祖諱初周大將軍  
隋宗正卿常州刺史順楊公皇朝左光祿大夫華山郡  
開國公食邑本鄉二千五百戶唐虞之稷契魏晉之裴  
王晏嬰可以事百君臯繇為之謨九德麾蓋兵馬人知

牧伯之尊名山大川蘊積公侯之氣王考諱安偽鄭王  
充逼授二十八將封鄆國公尋謀歸順為充所害皇朝  
贈大將軍旌忠烈也陶謙雅尚祖逖雄心會天子之蒙  
塵見諸侯之釋位雖陳平去就潛懷杖劍之謀而石勒  
凶殘遂及推墻之禍父某潤州句容遂州長江二縣令  
朝散大夫行鄧州司馬文武兼備清白在躬人無間言  
位不充量四方取則孔宣父之踐中都百里非才龐士  
元之登別駕若夫庭生玉樹身帶金鑲有衛玠之風神



有張良之容貌蔣琬之譏盛元責在司空陳蕃之對薛  
勤志清天下觀其昏定晨省立身揚名怪草蔚其休徵  
神魚會其冥感莊公獨嘆聞潁叔之純行有道相推見  
茅容之盡禮則閨門雍穆以孝聞也輔仁會友合志同  
方晏平仲之善交鮑叔牙之知我張堪死日妻子惟託  
於朱暉劉惔生平風月每思於玄度則朋友之德若蘭  
芬也朱穆好學中食忘飧譙周研精欣然獨笑張華四  
海之內若指諸掌班固百家之言無不窮究鉤深致遠

悅丘墳也八音繁會五色章明動天地而感鬼神序人  
倫而成孝敬陽臺並作楚襄王賜雲夢之田上林同時  
漢武帝給尚書之筆則瓊敷玉藻未足云也自攝齊東  
序撰杖西膠推宰我之能言貴顏回之有德成如麟角  
道尊於壁水之前翼若鴻毛俯拾於金門之下方將咫  
尺宣室扈從明庭申賈誼之忠謹盡揚雄之規諫豫章  
七載擢脩幹而聳長條有鳥三年搏積風而運滄海豈  
期數有述否天無皂白苗而不秀秀而不實蓋有是夫

古人有言歿而不朽者此之謂也春秋二十有六以上  
元三年五月二十二日歿于京師勝業里嗚呼哀哉至  
儀鳳四年十二月二日歸葬於華陰之某原不忘本也  
山河鬱鬱松栢蒼蒼骨肉閑兮歸后土魂魄遊兮思故  
鄉三荆搖落五都悲涼痛門戶之無主悼人琴之兩亡  
嗚呼哀哉其銘曰

高掌遠蹠濁涇清渭天子諸侯司空太尉星辰鼓舞山  
澤通氣道在者尊德成為貴賈家三虎偉節最怒荀氏

八龍慈明無雙劍光冲斗壁氣浮江據於道德聞於家  
邦子之承親溫席扇枕子之友悌同輿共寢朝歌不入  
盜泉不飲垂露崩雲繁絃縟錦明經太學射策鴻都對  
揚天子高揖司徒鱗翮搏運波濤不虞子之喪也良可  
悲夫瞻望不及佇立以泣惟見黃埃心腸以摧躑躅兮  
徘徊嗚呼兮哀哉長夜漫漫何時旦魂兮魂兮歸去來

從弟去溢墓誌銘

處士弘農楊去溢年二十即華山公之曾孫大將軍之

孫朝散大夫鄧州司馬之第四子也維嶽有五有華山之金石焉山阜相屬合谿懷谷所以鎮其南也維瀆有四有河宗之玉壁焉波瀾汨起迴泐萬里所以經其北也言其土地則巨靈之高掌遠蹠作西漢之城池叙其衣冠則太尉之四代五公為東京之柱國然後積勲累德枝分葉散大君有命臨夏日之壇場天子動容聽秋風之金鼓是以熊羆入兆羔鴈成羣黃憲之名聞於海內陳蕃之志掃於天下羣童忽聚逢苦李而先知賓客

相過問楊梅而即對善父母為孝善兄弟為友居家可  
移之道也利者義之和貞者事之幹元亨利新之德也  
若夫節陵遺策汲冢殘書倚相之八索九丘張華之千  
門萬戶莫不山藏海納學無所遺至如白雪迴光清風  
度曲崔亭伯真龍之氣揚子雲吐鳳之才莫不玉振金  
聲筆有餘力遠心天授高興生知盡江海之良圖得烟  
霞之秘美貞不絕俗從容於名教之場道由人弘坐卧  
於羲皇之代于時朝廷之上山林之下英儒瞻聞之士

洪筆麗藻之客希末光而影集聽餘聲而響和者猶藩  
籬之望天池鱗介之宗龜龍也嗟乎陰陽為道大道無  
亭毒之心禍福惟人聖人有抑揚之教智焉而斃仁焉  
而終今也則亡歎顏回之短命死而可作冀隨會之同  
歸文不在茲乎天之將喪也以某年某月某日終於某  
所越儀鳳四年十月二日歸葬於華陰之某原林野彌  
望闕山寥廓樵童牧豎孟嘗君之池臺一去千年丁令  
威之城郭悲纏於魯衛痛深於花萼姜肱沒齒無因共

被之歡鍾毓生年非復同車之樂嗚呼哀哉其銘曰

叔虞建國天錫之唐伯僑受氏食采於楊五侯簪紱四

代軒裳有德有行如圭如璋乃生男子初寢之牀從公

小大辨日炎涼天下之寶邦家之光神鋒太阿旗鼓相

當事親以禮左右無方交友以信芝蘭有芳文犀健筆

白鳳雕章鵬鸞齊致江湖兩忘謂天輔德則惟其常殲

我吉士于何不傷關山搖落洲渚蒼茫黃塵匝地白露

為霜左右刮骨親賓斷腸摧殘玉樹埋沒金鄉交交黃



鳥爰集于桑命不可續人之云亡

從甥梁錡墓誌銘

故右衛率府翊衛安定梁錡年二十有八以上元三年  
秋八月某日終於某所圖其景宿天有大梁之星辨其  
物土地有大梁之國考其衣冠人有大梁之姓綜乾坤  
而列位兼水土而成文業耕織而樂琴書有梁鴻之雅  
尚生封侯而死廟食有梁竦之雄圖西山求白鹿之仙  
東海受黃蛇之寶曾祖某光祿大夫開府儀同三司驃

騎將軍清河太守右衛大將軍同州刺史上柱國郡守  
旁通於月建儀同上法於太階光祿大夫下大夫之職  
驃騎將軍大將軍之比祖某河南澠池令鄭州司功叅  
軍事冀州蒲州二府事司馬朝散大夫紀王府司馬襄  
州同州二長史仲由宰邑蕭何主吏桓溫之徵謝奕暫  
為司馬之官周景之禮陳蕃仍降題與之命考某國子  
學生霍王府叅軍并州大都督府兵曹揚州大都督府錄  
事叅軍仲尼閒居曰參不敏天子命我叅卿軍事張常

山之福應直保金鉤謝太傅之閨門惟生玉樹所以圓  
光折水真氣衝天孩笑之時見之者知其孝友能言之  
際聽之者許其聰明審清河管輅之天文對江夏黃童  
之日蝕揮其勁翮則鳳凰飛鳴於赤山整其蘭筋則駿  
馬騰驤於陸地若夫神龍負卦瑞雀銜書安釐王汲冢  
之文穆天子羽陵之籍莫不因條報葉望表知裏鄭玄  
殫見覽萬卷之八千班固洽聞涉五經之四部至如琬  
弧夜月角力三才鐵劍秋霜烟雲五色莫不推之以智

勇成之以揖讓歷諸侯而說劍直之無前引司馬而操  
弓觀者如堵可謂多才天縱盛德日新曼倩不讓於詩  
書翁歸兼強於文武由是交通遂廣聲名益振朱家大  
俠滕公有然諾之言劇孟過人衣蓋有逢迎之禮及其  
從微至著資父事君藉丹書之勲業參黑衣之行伍神  
宮海外瞻鏤榜於明山太室雲端奏仙簧於洛水翊駕  
馳道周廬甲觀方當奉詞出使萬里行封受命忘身三  
軍拜將豈期年歲朝露浮生過隙漢逸人之雅操命也

如何魯司寇之知言苗而不秀嗚呼哀哉望吾子者空  
懷倚閭之嘆嗟余弟者獨有亡琴之悲從日月於龜謀  
考圖書於馬鬣越以儀鳳三年春二月某日甲子葬於  
某所悲夫吾見其進由來孔李之家吾謂之甥實曰何  
劉之族陽元既沒瞻舊宅而無成康伯不存對玄言而  
誰與其銘曰

山河帶礪金木精靈磊磊千丈森森五兵駢駢西掖出  
入東明人壽無幾皇天不平碑留郭泰挽送田橫終寂

寥於相宅空嗟嘆於佳城

盈川集卷九

盈川集卷十

唐 楊炯 撰

行狀

中書令汾陰公薛振行狀

高祖德魏給侍中黃門侍郎御史中尉散騎常侍直閣  
輔國二將軍齊州刺史贈車騎將軍儀同三司華州刺  
史謚曰簡懿曾祖孝通魏中書黃門二侍郎銀青光祿

大夫散騎常侍關西道大行臺右丞常山太守汾陰侯  
贈車騎將軍儀同三司齊鄭二州刺史祖道衡齊中書  
黃門二侍郎隋吏部內史二侍郎上開府儀同三司陵  
邛潘襄四州刺史襄州總管司隸大夫皇朝贈上開府  
臨河縣開國公父收皇朝上開府兼陝東道大行臺金  
部郎中天策上將軍府記室叅軍文學館學士上柱國  
汾陰縣開國男贈定州刺史太常寺卿謚曰獻河東郡  
汾陰縣薛振年六十二字元超狀昔者唐堯之協和萬



邦也有若四岳之敬順昊天厯象日月虞舜之慎徽五  
典也有若八元之忠肅恭懿宣慈惠和夏禹之分別九  
州也有若咎繇之謨明弼諧允迪厥德殷湯之南征北  
怨也有若伊尹之格於皇天姬文之受命作周也有若  
號叔之聞於上帝自唐虞而列考及秦漢而無譏元首  
必藉於股肱方隆太平之化賢者必待於明主克致崇  
尚之業若夫騁駕六龍驅馳七聖斟酌元氣裁成天道  
者其惟聖人乎弘闡大猷發揮神化匡正八極阜成兆

人者其惟良宰乎我大唐之建國也粵若神堯明揚側  
陋文王協於朕卜迎太公於渭水高宗求於朕夢得良  
弼於傅巖若歲大旱以為霖雨若濟巨川以為舟楫者  
也公含天地之間氣依日月之末光能備九德兼資百  
行探賾索隱極深研幾韶齡之際羞言霸道詞賦之間  
已成王佐六歲襲爵汾陰男十一太宗召見勅弘文館  
讀書十六為神堯皇帝挽郎十九尚和靜縣主高宗升  
儲之日也勅公為太子通事舍人二十二除太子舍人

高宗踐位詔遷朝散大夫守給事中年二十六尋拜中  
書舍人弘文館學士三十二丁太夫人憂去職起為黃  
門侍郎固辭不許脩東殿新書畢進爵為侯公毀瘠過  
禮多不視事出為饒州刺史上夢公徵為右成務四十  
復為東臺侍郎是歲也放李義府于邛笮舊制流人禁  
乘馬公為之言左遷簡州刺史歲餘上官儀伏誅坐詞  
翰往來徙居越雋五十三赦還拜正諫大夫五十四遷  
中書侍郎尋同中書門下三品兼檢校太子左庶子五十

九遷中書令車駕幸洛陽詔公兼戶部尚書與皇太子  
居守俄以風疾不視事高宗崩輿疾往成都抗表辭位  
至於再至於三詔加金紫光祿大夫仍聽致仕以光宅  
元年季冬旁死魄薨於洛陽豐財里之私第嗚呼哀哉  
公地藉膏腴姻連戚里鼎湖長往拜卿子而為郎金榜  
洞開徵列侯而尚主遂乃彈冠筮仕策名委質叩天門  
於畫闕攀鳳翼於紫宸凡升右轄者一年居外臺者兩  
部四遷門下三入中書用能燮理我陰陽經緯我天地

鹽梅我寶鼎梁棟我宸極理百官而察萬人平邦國而  
和上下借如風后力牧左右軒皇蕭何曹參謀猷漢室  
未有一心事主四十餘年叅兩宮而出入歷三臺而陟  
降合其道也大壑縱其鯤鵬遇其時也名山出其雲雨  
功成輔弼德邁機深星象不憊方踐中台之位山川並  
走竟遊東岱之魂天不憖遺民將安仰越翼日詔贈光  
祿大夫使持節都督秦成武渭四州諸軍事秦州刺史  
餘如故賜物四百段米粟四百石東園秘器凶事給儀

仗至墓所往還司賓卿監護璽書弔祭別降中使賜斂衣一襲雜物百段又詔陪葬乾陵依故事也公襲封之年也受左傳於同郡韓文汪至天王狩河陽乃廢書而嘆曰周朝豈無良相何得以臣召君文汪異焉神堯皇帝婕妤河東郡夫人公之姑也每侍高宗詞翰高宗嘗顧曰不見婕妤姪經數日便謂社稷不安其見重如此上幸溫泉射猛獸公奏疏極諫上深納焉後因閑居謂公曰我昔在春宮與卿俱少壯光陰倏忽已三十年往

日賢臣良將索然俱盡我與卿白首相見卿歷觀書傳  
君臣共終白首者幾人我觀卿大憐我我亦記卿深公  
嗚咽稽首謝曰老臣早叅麾蓋文皇委之以心膂臣又  
多幸天皇任之以股肱誓期殺身報國致一人於堯舜  
伏願天皇遵黃老之術養生衛壽則天下幸甚賜黃金  
二百鎰公有事君之節也不亦忠乎每讀孝子忠臣傳  
未嘗不慷慨流涕以為帝舜非孝子朱虛非忠臣客有  
譏之者公曰寧有揚君父之過而稱忠孝哉太夫人薨

公每哭嘔血杖而後起上見公柴毀泣曰朕遂不識卿卿事朕君父一致遂至於滅性可謂孝子中書省有一磐石隋內史府君常踞而草詔及公揮翰躍鱗每見此石未嘗不泣然流涕公有立身之道也不亦孝乎其年脩晉史筆削之美為當時最孝敬崩詔公為哀冊上幸九成宮勅皇太子赴行在所置酒別殿享王公以下時太子英王侍皇帝酒酒酣公獻壽曰天皇合易象乾將三男震坎艮今日是也上大悅百官舞蹈稱萬歲賜雜



物百段銀鏤鍾一枚吐蕃不庭詔英王為元帥總戎西  
討公賦西征詩一首上稱善嗟嘆者久之因代英王屬  
和御筆繕寫朝以為榮公有屬詞之美也不亦文乎黃  
門侍郎上疏薦高智周任希古郭正一王義方顧徹孟  
利貞等後皆有重名厯登清貴及兼左庶子又表鄭祖  
玄沈伯儀賀覲鄧玄捷顏強學崔融等十人為學士天  
下服其知人公為右丞務獻封禪書及平夷策上深納  
焉或有抵罪者同類數百經赦令獄官評經年不決竟

以死論公上疏陳其濫詔百寮建議獄官及宰臣未有  
所決公酬對如響衆咸服焉上歎息曰幾令我殺無辜  
之人百寮莫不震懼又上疏陳請備塞垣未幾而匈奴  
背誕公有神通之鑒也不亦明乎儀表魁傑鬚眉若畫  
身長七尺四寸望之儼然喜愠不形於色雖至於近習  
左右胥徒僕妾莫不待之以禮公有行己之方也不亦  
恭乎在饒州六年以仁明馭下鄱陽北崗上忽生芝草  
一株郡人以為善政所感共起一舍號曰芝亭因立碑

頌德公有馭人之術也不亦惠乎在印笈十餘載沉研  
易象韋編三絕賦詩縱酒以樂當年有醉後集三卷行  
於世公有安和之德也不亦康乎上初覽萬機公上疏  
論社稷安危君臣得失上大驚即日召見不覺膝之前  
席歎曰覽卿疏若暗室而照天光臨明鏡而覩萬象此  
後寵遇日隆每軍國大事必叅謀帷幄在中書獨掌機  
務者五年出納帝命口占數首上曰使卿長在中書一  
夔足矣大駕東巡詔公驟乘上曰朕之留卿若去一目

若斷一臂關西事重一以委卿因賜物百段公有社稷之勲也不亦重乎若夫有官功者賜其官族有大行者受其大名公叔列國之陪臣猶安社稷黜婁匹夫之介節不忘仁義古今以為通訓書籍以為美談況乎輔佐明主寧濟天下生死無二始終若一業高於六相道貫於五臣其生也榮同心比於周召其死也哀陪葬均於衛霍豈使易名之典不及於會同賜諡之文不傳於終古門生故吏願述德音博士禮官佇聞清議是則鍾繇

之策降於皇魏之年王導之疏寢於中興之日謹狀垂  
拱元年四月四日故中書令汾陰公府功曹姓名謹狀  
文昌臺考功竊聞生為貴臣車服昭其令德死而不朽  
謚號光其大名今謹按故府主中書令汾陰公贈秦州  
都督薛元超以王佐之才逢太平之會撫綏萬國康濟  
兆人力收輔軒皇未為盡善臯陶佐大禹猶有慙德名  
遂身退生榮死哀羽父之請魯君抑惟舊典衛侯之謚  
文子庶幾前烈謹上

左武衛將軍成安子崔獻行狀

祖弘壽隋獲鹿嘉樂縣開國侯父萬善皇朝左監門將軍持節隆州諸軍事守隆州刺史上護軍成安縣開國男謚曰信郡縣崔獻年六十七夫推其天命南端上將之文考其地靈北極崆峒之武獻次有東方曼倩早達於孫吳瑯琊有諸葛孔明深期於管樂貞觀九年起家太穆皇后挽郎十六年授營州都督府參軍事燕齊遼遠所以分置營州天子命我以叅卿軍事太宗文武聖

皇帝把斧鉞動璇璣發四方之人爰整其旅問東夷之  
罪恭行天罰公自家刑國資父事君樂王桀之神武棄  
班超之筆硯一鼓作氣方輕肉食之謀七旬舞干始受  
昌言之拜二十三年遷除王府西閣祭酒梁王武者漢  
王之少子廣東苑屬平臺則司馬相如所以騁其詞賦  
陳思王植者魏國之天人遊西園擁飛蓋則邯鄲子淑  
所以為其賓友永徽六年授晉州司士龍朔三年遷岐  
州司戶剪桐垂棘珪璧相輝紫鳳寶雞休祥狎至從乾

值巽之風土被山帶河之國邑邦君坐嘯方推太守之  
名鄰國從遊始屈陪臣之禮尋丁外憂三年泣血一慟  
能使禽獸莫觸其松柏神仙每留其玉石春秋忽變有  
君子之終身金革不辭達賢人之俯就麟德元年有詔  
起公為左威衛脩仁府左果毅都尉仍命羽林軍長上  
乘輿歷日月步山川詳益部之圖書聽干雲之律呂長  
城十角盡入提封高闕三襲並為州縣於是九姓抗表  
請築安北府城詔公馳驛許以便宜行事則榮奉中旨



計日期還親降鑒與待於故都樓上雖復東西萬里張  
博望之尋河裝橐千金陸大夫之使越猶未聞降星蹕  
迴帝車擬於陶侃扣天門之八襲方於魯陽留白日於  
三舍若夫類上帝徧羣神則孔宣父之所刊者五年一  
狩登泰山禪梁甫則管夷吾之所識者十有二君秦皇  
致風雨之迷魏后積貂羊之恥夫名山之所望非我后  
而誰哉是以馭蒼龍控玉鳳陰陽不測發揮於作樂之  
文天地無私揖讓於升中之禮公乃陪祠汶上扈蹕梁

陰列藩衛於環星受嘉名於捧日與夫茂陵之下獨留  
符命之書河洛之間不覩漢家之事豈同年而語也朝  
鮮舊壤歌箕子之風謠斗骨危城屬河孫之背誕地惟  
孤竹不聞謙讓之名親則同株曾無急難之意特進泉  
男生以蕭牆構孽蔓草方滋欲去危而就安思轉禍而  
為福請歸有道使者相望天皇懸一物之推溝詔公於  
國城內迎接先之以造化之大示之以雷霆之威受其  
壁焚其櫬更徵侍子來朝京闕亦猶鄒生憑軾入齊國

而下其城賈誼上書伏匈奴而笞其背乾元元年詔遷  
遊騎將軍左威衛義陽府折衝都尉仍加上柱國右羽  
林軍長上如故是歲也太子太師英國公登壇而拜鑿  
門而出紫泥明詔不入於三軍之中黃石奇兵自行於  
九天之外山林為室不能有藩籬之險魚鼈成橋不能  
有逃亡之路詔公出使預叅帷幄進奇策納嘉謀懷無  
臂而執無兵戰必勝而攻必取斬大風之翼霧卷青丘  
卧長鯨之鱗烟銷碧海二年以平夷功詔除定遠將軍

右武衛中郎將檢校左羽林軍總章二年詔遷宣威將軍守左武衛將軍檢校右羽林襲封成安男咸亨二年進爵為子尋奉別勅檢校右羽林軍餘如故太夫人以桑榆晚節霧露沉痾減年歲之扶危授皇天之賜藥屢陳表疏方請告歸頻降絲綸未蒙優許則知忠臣奉上多從孝子之門受命臨戎始見忘家之事潘安仁之愷悌始奉板輿張景胤之純深終悲畫扇儀鳳三年以內憂解職尋降詔起復本官四年加雲麾將軍正除左武

衛將軍檢校右羽林軍如故王人奪服纔聞趙熹之喪  
明主相憂獨訝何曾之毀且割哀而從禮將以義而斷  
恩受軍麾命服之數掌期門飲飛之職以漢宮清署忽  
照邊烽秦塞長城遂聞胡馬匈奴未滅霍去病所以辭  
家天子動容周亞夫於焉不拜調露元年詔公龍門鎮  
守兼於夏州防捍飲冰受命倍道兼行鞍甲成勞晦明  
為疾璽書降問即日追還中使接迹於家庭尚藥綢繆  
於錫賚人生詎幾神道何知仰觀於天值三軍之星落

俯察於地逢五將之山崩詔書來北斗之門圖像在南  
宮之壁以三年秋七月薨於紫桂宮右羽林軍之官第  
詔賜御食并錦被一張常服一襲雜彩百五十段贈物  
一百段粟一百石勅書弔贈禮越常班喪用所資數優  
恒典琳琅觸目日月在懷陶謙則戲列旛旗賈逵則常  
陳部伍閨門有德歡若交朋事君無隱心如鐵石至如  
出車授鉞東征西討孤虛向背則雖女子之衆可以當  
於丈夫前後折旋則雖婦人之兵可以蹈於湯火免起

而鳧舉龍騰而鳳飛無戰不平無城不剋有如馮異羞  
言大樹之功宛似魯連不受黃金之賞太平之事業行  
矣人主之恩榮備矣山河之寵久預同盟社稷之臣俄  
悲輟祭聖君興悼列辟相趨覩高鳥而歎良弓聞鼓鼙  
而思將帥宏圖秘畧實無得而稱焉追遠飾終請有易  
其名者謹狀永隆二年正月十一日故左武衛將軍成  
安子府功曹某上尚書省考功名也者功之表也謚也  
者行之跡也公叔文子曾辱四隣之交黔婁先生有餘

天下之貴謹按故府主左武衛將軍上柱國成安子崔  
獻誕靈辰昴降德山河漢陽閭忠許有良平之策潁川  
徐庶知其管樂之才生覩太平仕逢明主秋風金鼓有  
司馬之論兵吉日壇場有將軍之拜職任重而道遠功  
成而身退奄息百夫之特彼蒼者天相如千載之人猶  
有生氣珠襦玉匣禮脩於喪終筮短龜長事從於先見  
易名之道蓋取之於舊儀累德之文敢望之於執事謹  
狀



祭文

為薛令祭劉少監文

中書令河東薛某謹以清酌中牢之奠敬祭故少監劉  
公之靈惟此陶唐有此冀方上天祚漢人神攸贊開國  
承家枝分葉散三貂赫赫於臺省駟馬諼諼於里閭德  
之有隣吐符兮降神家之積慶受祿兮宜君星躔可以  
衝南越都邑可以質西秦言鄭公之不死謂張衡之後  
身雍州為積高之地初登吏部尚書即喉舌之端始拜

郎官見天子而題柱侍明光而握蘭入麒麟之閣圖書  
掌於河洛測璇玉之璣造化窮於制作大風積也方絕  
於雲天有力負之生悲於溝壑嗚呼哀哉言念平生求  
其友聲適我願兮共得朋從之道又吾姨也俱承下嫁  
之榮良辰美景必躬於樂事茂林脩竹每協於高情援  
荳蘭而無愧指金石以當行誰言倏忽遽隔幽明人非  
兮地是心折兮骨驚卜日兮天未遠陰雲凝兮歲將晚  
臨平原兮望行懷君一去兮何時返石室兮沉沉蓬萊

山兮寂又陰蒼烟漫兮紫苔深陳絮酒兮涕沾襟嗚呼  
哀哉

同詹事府官寮祭郝少保文

少詹事鄧玄機永昌令令狐恩府司直王思善楊炯主  
簿鄭行該等謹以清酌庶羞之奠敬祭太子少保郝公  
之靈若夫星象降質山川受氣以道為尊以和為貴軒  
后夢之於大澤文王卜之於清渭實馮舟楫之功必藉  
鹽梅之味昭昭北斗宮號文昌隱隱西掖池名鳳凰增

萬機而叅政本定五字而對休光珥豐貂之韡韡識遺  
佩之鏘鏘懸車之歲方稱國老步輦之榮遂居師保劉  
蕃以光祿緝熙和嶠以尚書贊道百年方享於期頤五  
福冀徵於壽考西山訪樂北壁尋經金丹不化玉藥何  
成梁木斯壞曲池坐平府庭颯而變色察采恠而相驚  
嗚呼哀哉玄機等親聞教義夙承提獎懷德音之不忘  
痛丹壑之長往門館聞寂簾帷彷彿真行潦之蘋蘩庶  
明靈之降饗嗚呼哀哉

為梓州官屬祭陸鄴縣文

維垂拱二年太歲景戌正月壬寅朔二十二日癸亥長  
史劉某謹以清酌庶羞之奠敬祭陸明府之靈夫萬里  
之別猶使飲淚成血思德音之斷絕況百年之分能不  
憂心如熏想公子兮氛氲惟彼積德挺生夫君天垂白  
氣地發黃雲江則有記為國之紀君傳其政愛人如子  
山則有梁鎮茲一方君弘其道視人如傷久勞於外路  
阻且長曾未晷月人之云亡嗚呼哀哉哀哀弱嗣朝暮

一溢皎皎孀妻頽乎下室蜀門如劍長安如日歸路何  
從我心如疾嗚呼哀哉凡我在位羈官邊城共戮力兮  
誰言死生思其人兮造其戶庭恍無見兮寂無聲稱觴  
兮酹酒心折兮骨驚嗚呼哀哉

祭汾陰公文

維大唐光宅之元祀太歲甲申冬十有二月戊寅朔丁  
亥御辰楊炯以柔毛清酒之奠敢昭告於故中書令汾  
陰公之貴神惟公含純德而載誕兮稟元精而秀出備

五行而立身兮半千年而委質屬天地之貞觀兮逢聖  
人之得一若夔龍稷高之寅亮舜朝兮若蕭曹魏邴之  
謀猷漢室懸大名於宇宙兮立大勲於輔弼如何斯人  
而有斯疾曾未遐壽中年殞卒嗚呼哀哉若夫家傳寶  
鼎地闢金樓文則屬詞而比事兮學則八索而九丘入  
則東藩之上相兮出則南面之諸侯唯盡善兮未善固  
雖休而勿休既知退而知進兮亦能剛而能柔大才則  
九功惟敘兮大智則萬物潛周崇德廣業兮樂天知命

而不憂嗚呼哀哉門館虛兮寂寞歲窮陰兮搖落備物  
儼兮如存光靈渺兮焉託垂綬帷與組帳兮罷歌臺與  
舞閣天子惜其昆余兮羣臣思其可作嗚呼哀哉俯循  
兮弱齡叨襲兮簪纓公夕拜之時也既齒跡於渠閣公  
春華之日也又陪遊於層城叅兩宮而承顧盼兮歷二  
紀而洽恩榮郭有道之青目兮蔡中郎之下迎條焉今  
古非復平生無德不報兮願摩頂而至足有生必死兮  
空飲恨而吞聲天慘慘兮氣冥冥月窮紀兮日上丁籍



白茅兮無咎和黍稷兮非馨嗚呼哀哉

盈川集卷十

楊盈川集附錄

唐書本傳

劉昫

楊烱華陰人伯祖虔威武德中官至右衛將軍烱幼聰敏博學善屬文神童舉拜校書郎為崇文館學士儀鳳中太常博士蘇知幾上表以公卿以下冕服請別立節文勅下有司詳議烱獻議曰古者太昊庖犧氏仰以觀象俯以察法造書契而文籍生次有黃帝軒轅氏長而敦敏成而聰明垂衣裳而天下理其後數遷五德君非

一姓體國經野建邦設都文質所以再而復正朔所以  
三而改夫改正朔者謂夏后氏之建寅殷人建丑周人  
建子至於以日繫月以月繫時以時繫年此三王相襲  
之道也夫易服色者謂夏后氏尚黑殷人尚白周人尚  
赤至於山龍華蟲宗彝藻火粉米黼黻此又百代可知  
之道謹按虞書曰予欲觀古人之象日月星辰山龍華  
蟲作會宗彝藻火粉米黼黻締繡由此言之則其所從  
來者尚矣日月星辰者光明照下土也山者布散雲雨

象聖王大澤霑下也龍者變化無方象聖王應時布教也華蟲者雉也身被五彩象聖王體兼文明也宗彞者虎雉也以剛猛制物象聖王神武定亂也藻者逐水下象聖王隨感而應也火者陶冶烹飪象聖王至德日新也粉米者人恃以生象聖王為物之所賴也黼能斷割象聖王臨事能決也黻能兩已相背象君臣可否相濟也迨有周氏乃以日月星辰為旌旗之飾又登龍於山登火於宗彞於是乎制袞冕以祀先王也九章者法陽

數也以龍為首章衮者卷也龍德神異應變潛見表聖  
王深識遠智卷舒神化也又制鷩冕以祭先公也鷩者雉  
也有耿介之志表公有賢才能守耿介之節也又制毳  
冕以祭四望岳瀆之神也武雉者山林所生明其象也  
制絺冕以祭社稷土穀之神也社稷粉米由之成象其  
功也又制玄冕以祭羣小祀百神異形難可遍擬但取  
黻之相背異名也夫以周公之多才也故治定制禮功  
成作樂夫以孔宣之將聖也故行夏之時服周之冕先

王之法服乃自此之出矣天下之能事又於是乎畢矣  
今知幾表狀請制大明冕十三章乘輿服之者謹按日  
月星辰者已施於旌旗矣龍武山火者又不踰於古矣  
而云麟鳳有四靈之名玄龜有負圖之應雲有紀官之  
號水有盛德之象此蓋別表休徵終是無踰此象然則  
皇王受命天地興符仰觀則璧合珠連俯察則銀黃玉  
紫殫南宮之粉壁不足寫其形狀罄東觀之鈔黃未可  
紀其名實固不可畢陳於法服也雲者龍之氣也水者

藻之自生也又不假別為章目也此蓋不經之甚也又  
鸞冕八章三公服之者鸞者太平之瑞也非三公之德  
也鷹鷩者鷩鳥也適可以辨祥刑之職也熊者猛獸也  
適可以旌武臣之力也又稱藻為水草無所法象引張  
衡賦蒂倒茄於藻井披紅葩之狎獵請為蓮華取其文  
彩者夫茄者蓮也若以蓮代藻變古從今既不知草木  
之名又未達文章之意此又不經之甚也又毳冕六章  
三品服之者按此王者祀四望服之名也今三品乃得



同王之毳冕而三公不得同王之衮名豈惟顛倒衣裳  
抑亦自相矛盾此又不經之甚也又黻冕四章五品服  
之考之於古則無其名驗之於今則非章首此又不經  
之甚也若夫禮唯從俗則命為制令為詔乃秦皇之故  
事猶可以適於今矣若夫義取隨時則出稱警入稱蹕  
乃漢國之舊儀猶可以行於代矣亦何取於變周公之  
軌物改宣尼之法度者哉由是竟寢知幾所請烱俄遷  
詹事司直則天初坐從祖弟神讓犯逆左轉梓州司法

叅軍秩滿選授盈川令如意元年七月望日宮中出孟  
蘭盆分送佛寺則天御洛南門與百僚觀之炯獻孟蘭  
賦詞甚雅麗炯至官為政殘酷人吏動不如意輒榜撻  
之又所居府舍多進士亭臺皆書榜額為之美名大為  
遠近所笑無何卒官中宗即位以舊寮追贈著作郎文  
集三十卷炯與王勃盧照隣駱賓王以文詞齊名海內  
稱為王楊盧駱亦號為四傑炯聞之謂人曰吾愧在盧  
前恥居王後當時議者亦以為然其後崔融李嶠張說

俱重四傑之文崔融曰王勃文章宏逸有絕塵之迹固  
非常流所及炯與照隣可以企及盈川之言信矣說曰  
楊盈川文思如懸河注水酌之不竭既優於盧亦不減  
王恥居王後信然愧在盧前謙也

新唐書本傳

歐陽脩

楊炯華陰人舉神童授校書郎永隆二年皇太子已釋  
奠表豪俊充崇文館學士中書侍郎薛元超薦炯及鄭  
祖玄鄧玄挺崔融等詔可遷詹事司直俄坐從父弟神

讓與徐敬業亂出為梓州司法叅軍遷盈川令張說以  
箴贈行戒其苛至官果以嚴稱吏稍忤意榜撻之不為  
人所多卒於官中宗時贈著作郎

贈別楊盈川箴

張說

杳杳深谷森森喬木天與之才或解其祿君服六藝道  
德為尊君居百里風化之源才勿驕恠政勿苛煩明神  
是福而小人不寬畏其不畏存其不存作誥茲酒成敗  
之根勒銘其口禍福之門雖有韶夏勿棄擊轅豈無車

馬敢贈一言

溫泉莊卧病寄楊七炯

宋之問

多病卧茲嶺寥寥  
縷幽獨賴有蒿丘山  
高枕常在目茲山  
樓靈異朝夜翳雲族  
是日濛雨晴返景入  
巖谷暮暮緣澗草菁菁  
山下木此意方無窮  
環顧悵林麓伊洛何  
悠漫洲源信重複  
夏餘鳥獸蕃秋末禾黍熟  
秉願守樊圃歸間欣  
藝牧惜無載酒人徒把  
涼泉掬

祭楊盈川文

宋之問

維大周某年月日西河宋某謹以清酌脯羞之奠敬祭  
於楊子之靈曰自古皆死不朽者文北河吐液西岳生  
靈爰協通氣降精於君伏道孔門遊及諸子精微博識  
黃中通理屬辭比事宗經匠史玉璞金渾風搖雲起聞  
人之善若任諸己受人之恩許之以死惟子堅剛氣凌  
秋霜行不苟合言不苟忘大君有命徵子文房余亦叨  
忝隨君頡頏同趨北禁并拜東堂志事俱得形骸兩忘  
載罹寒暑負病洛陽裘馬同敝老幼均糧自君出宰南

浮江海余嘗苦饑今日猶在之子妙年香名早傳從來  
金馬夙昔崇賢門庭若市翰墨如泉千載之後聞而凜  
然死而不亡問予何傷傷予命薄益州零落生平之言  
幽顯相託痛君不嗣匪我孤諾君有兄弟同心異體陟  
岡增哀歸葬以禮旅櫬飄零于洛之汀我之懷矣感歎  
入冥見子之弟類子之形悼往心絕慰存涕盈古人有  
言一死一生昔子往矣追送傾城今子來也乃知交情  
惟郭是戚有崔不易來哭來祭哀文在席惟席何依永

雪洒滿家人哀哀賓從微斷令我傷悲情懃昔時子文  
子翰我絨我持子宅子兆我營我思子有神鑒我言不  
欺我有絮酒子其歆之我亦引滿儻昭神期魂兮歸來  
聞余此詞

唐會要

王溥

永隆二年二月六日皇太子親行釋奠之禮畢上表請  
特延耆碩英髦之士為崇文館學士於是薛元超表薦  
鄭祖玄楊炯崔融等並為學士



容齋隨筆

洪邁

楊炯等四子之文皆精切有本原其用駢儷作記序碑碣蓋一時體格如此而後來頗議之杜詩云王楊盧駱當時體輕薄為文哂未休爾曹身與名俱滅不廢江河萬古流正謂此耳身名俱滅以責輕薄子江河萬古流指四子也

文獻通考

馬端臨

楊盈川集二十卷晁氏曰唐楊炯也炯華陰人顯慶四

年舉神童授校書郎終婺州盈川令炯博學善屬文與  
王勃等以文辭齊名海內稱王楊盧駱四才子亦曰四  
傑炯自謂吾媿在盧前耻居王後張說曰盈川文如懸  
河酌之不竭耻王後信然媿盧前謙也集本三十卷今  
多亡逸

唐詩紀事

計敏夫

炯華陰人永隆二年皇太子已釋奠求豪俊充崇文館  
學士後為盈川令張說以箴贈行戒其苛至官果以嚴

稱卒於官中宗時贈著作郎

唐書裴行儉傳

宋祁

裴行儉在吏部李敬玄盛稱王勃楊炯盧照隣駱賓王  
行儉曰士之致遠先器識而後文藝勃等雖有文才然  
浮躁銜露豈享爵祿之器楊子頗沉默可至令長餘得  
令終足矣後勃等皆不得其死而炯終盈川令

唐詩品彙

高棟

楊炯華陰人舉神童遷盈川令武后時與宋之問分直

習藝館卒有盈川集三十卷

楊烱集序

張遜業

楊烱華陰人幼博學聰慧揮文宏富拜校書郎為崇文館學士神童舉也太常博士蘇知幾儀鳳中上表以公卿以下冕服請別立節文勅命詳議於有司烱獻議極詆之言知幾變之不經甚矣由是竟寢知幾所請烱俄遷詹事司直則天初坐從祖弟神讓犯逆左轉梓州司法叅軍秩滿遷受盈川令為政殘酷榜殺下吏輒不為

意美名多榜亭臺恥笑動衆竟卒於官中宗即位贈著作郎以舊僚追及也平生著作惟存是帙三十卷者惜未之見也其自評吾愧在盧前恥居王後張說以其文思如懸河注水酌之不竭既優於盧亦不減王恥居王後信然愧在盧前謙也論曰炯之賦詞義明暢若庖丁解牛自中肯綮而渾天考覈更見沉深推厯氏今猶擇焉五言律工緻而得明澹之旨沈宋肩偕開元諸人去其纖麗蓋啓之也諸作差次之五言古詩唐人各自成

家備一代制可也然以漢魏鏡之人人懸絕矣

謹案卷九第二頁前一行宋之戴公尚聞商頌刊  
本宋訛魯據詩序改

第五頁前七行高辛之撫教萬方刊本辛訛芊據  
英華本改

第十一頁前六行七行山枕梅根之治刊本梅訛  
海治訛治據庾信枯樹賦改

第十一頁後七行屬河孫南走刊本孫訛縣據北  
魏書高句麗傳改又衛滿東亡刊本滿訛蒲據

史記漢書朝鮮傳改

第十五頁前一行彤弓一而鉞矢千刊本鉞訛旃  
今改

第二十頁後七行揚州大都督府錄事參軍刊  
本脫督字據英華本增

卷十第三頁前八行兼校太子左庶子刊本脫校  
字據唐書薛元超傳增

第八頁後五行南端上將之文刊本文訛女據英



華本改

第十三頁後五行奄息百夫之特刊本奄訛荀據  
英華本改

第十六頁後一行頽乎下室刊本頽訛饋據英華  
本改

附錄第二頁前一行象聖王應時布教也刊本教  
訛殺據唐書本傳改


第二頁前五行象聖王為物之所賴也刊本脫為

字據唐書本傳增

第二頁後二行表聖王深識遠智刊本識訛沉據  
唐書本傳改

第八頁前一行洪邁刊本邁訛迄今改





總校官庶吉士臣侍朝  
校對官編修臣楊壽楠  
膳錄監生臣王錡